

12/03/2004

24 muka baru, 3 veteran dicalon

Norbakti Alias; Johari Ibrahim; Faiza Zainudin Azman Mahmood  
PENGUMUMAN CALON KEDAH/KELANTAN

ALOR STAR: Tiga tokoh politik veteran tampil semula bersama 24 muka baru sebagai calon Barisan Nasional (BN) bagi kerusi Parlimen dan Dewan Undangan Negeri (DUN) di Kedah pada pilihan raya umum 21 Mac ini.

Mereka yang diletakkan semula sebagai calon adalah bekas Exco kanan, Datuk Abdul Rahman Ibrahim dan Datuk Wan Azmi Ariffin, masing-masing di Parlimen Pokok Sena dan Sik.

Seorang lagi ialah bekas Timbalan Menteri Kewangan, Datuk Dr Affifuddin Omar yang akan bertanding bagi Dewan Undangan Negeri (DUN) Kuala Nerang.

Empat muka baru bagi kerusi Parlimen adalah pakar motivasi dan penceramah bebas, Datuk Dr Mashitah Ibrahim di Baling; Penasihat Media Kementerian Penerangan, Datuk Zainuddin Maidin di Merbuk; Hashim Yahya di Kuala Kedah; dan Setiausaha Politik Perdana Menteri, Datuk Johari Baharom, Kubang Pasu.

Bekas Menteri Besar, Tan Sri Sanusi Junid pula digugurkan daripada mempertahankan DUN Kuah, bersama tujuh penyandang lain termasuk Exco Pelancongan, Datuk Osman Md Aji.

Empat lagi penyandang, termasuk bekas Perdana Menteri, Tun Dr Mahathir dan Tun Daim Zainuddin awal-awal lagi sudah menarik diri daripada bertanding.

Pengumuman nama calon dibuat Menteri Besar, Datuk Seri Syed Razak Syed Zain di perkarangan kediaman rasminya dihadiri lebih 3,000 penyokong. Semua calon kemudian menerima watakah pencalonan mereka daripada Dr Mahathir yang juga Penasihat Pilihan Raya BN Kedah.

"Mereka yang dicalonkan bukanlah untuk suka-suka tetapi perlu anggap ia satu tanggungjawab dan mereka yang tidak dicalonkan perlu menganggapnya sebagai tanggungjawab juga.

"Semua ahli perlu menerima dengan tenang dan kita harapkan calon diterima rakyat," katanya.

Dr Mashitah, 39, yang dianggap Syed Razak sebagai 'calon pilihan' menerima tepukan gemuruh hadirin apabila namanya diumumkan.

Beliau dijangka menentang bekas imam besar Masjid Negara yang juga penyandang kerusi Baling, Taib Azamuddin Md Taib.

Barisan calon BN kali ini juga memperlihatkan empat wakil Pemuda Umno, termasuk naib ketuanya, Datuk Abdul Aziz Sheikh Fadzir yang akan bertanding di DUN Kuala Ketil serta satu dari MCA.

Sayap terbaru Umno iaitu Puteri turut mendapat satu pencalonan menerusi Ketua Puteri Kedah, Suraya Yaakob yang akan bertanding di DUN Sungai Tiang menggantikan Md Rozai Shafian yang diletakkan di Parlimen Pendang mengisi tempat Datuk Othman Abdul yang digugurkan.